

Na, te rerenga mai o nga tangata o ia iwi, o ia iwi, Waikato, Hauraki, Ngatihaua, Ngaiterangi, Ngatiwhakaue, Wakatohea, Ngatiporou, Ngatikahungunu, ki tenei Hui i runga i te whakaaro tahi. Ano te pai, ano te ahuareka, o tenei tu noho, o te noho tahi.

Kotahi te mea i hapa. Na, ko te pakeha hei noho tahi. Kahore ano kia ata rite te kupu a te tatau waiata. Te tuakana kua tae mai, te Teina kua noho atu. Me noho tahi te teina raua ko te tuakana.

Ko wai te Tuakana? na, ko koutou ko nga Tamariki a Hema. Kowai te Teina, na ko matou, ko nga tamariki a Tapeta. Me noho ke ranei matou? me noho tahi ranei? tena koa, hurihia mariretia taku patai.

Ehara tenei i te pokanoa, i haere mai ai te pakeha ki tenei whenua. Engari he kawenga na te Atua. Nga Minita Pakeha. Na te kupu whakamutunga a te Karaiti, a te Tamaiti a te Atua,—“Haere koutou ki te ao katoa, kawhautia te rongo pai ki nga tangata katoa.”—(Maka 16, 15.)

Tenei ano te kupu a te Atua, mo matou katoa, mo nga Tamariki a Tapeta.

“Ka meinga a Tapeta e te Atua kia tohatoha noa atu, ka noho ano hoki ia ki nga teneti o Hema.”—(Kenekhi 9, 27.)

Ko te tino tikanga tenei o te tatou waiata; kua ra taua e whakatete ki a taua, he teina he tuakana nei hoki taua. (Kenekhi 13, 8.) Engari, kia pai, kia ahuareka, te noho o nga teina o nga tuakana i runga i te whakaaro tahi.

Kua rongo koutou ki ta te Atua i pai ai. Tenei ke te mahi a Hatana, me waiho a Ihairaira hei whakatupato mo tatou.

He tangata mohio rawa a Horomona, Tama a Rawiri. Koroheke ka koroheke, parori ke tona ngakau, whaia te karakia whakapakoko. Koia te Atua i mea ai, kia wahia tona kingitanga kia rua. He whakaaro ki a Rawiri, ki tona papa, i roa ai te wehewehenga. No Rehopoama, no tana tamaiti, ka tahi ka tino wehea. Kotahi tekau nga iwi ki te kingitanga o Ihairaira. Erua ki te kingitanga o Huria. Te take, he pakeke no Rehopoama. He taitamariki hikaka tena, kikai i rongo ki nga matua. Ko taku mohiotanga tenei, ko te tino tupuna o te kino, ko te pakeke. Korero mai, korero atu, ngawari mai, ka kore te pakanga. Whaktika ake, ko Heropoama. Na te Atua ia i tu pai ai, nana ano ia i tu kino ai. Me i pai ia ki te whakakotahi, kua tu pai. I tu kino ai ia, he wehewehe hoki. Kahore ia i pai kia haere ana tangata ki Hiruharama karakia ai. Wahia e ia temepara, kia rua, te karakia kia rua, te ture kia rua. Peratia te mahi me ta Horomona, he karakia whakapakoko. Hanga e ia nga kuao kau erua tahi, hei rite ki te karakia o Ihipa. Tupu ake, tupu ake, he kingi kino. he kingi kino, mo Ihairaira, taea noatia te ra, i roo herehere ai nga iwi kotahi te kau, a, ngaro noa.

Koia i whakaauia ai tona ingoa:—Ko Heropoama tama a Nepata, nana a Ihairaira i mea kia hana.

Huri noa nga tau kotahi mano, na, ka tae mai a te Karaiti. Kua hoki etahi o nga tamariki o Ihairaira ki Hamaria, me te mau ano i to ratou pakanga. E mohio ana koutou ki te korero a te Karaiti raua ko te wahine o Hamaria. (Hoani 4, 9.) Heoi ano ta ratou i pai ai, he kati kau. Katia nga kai, katia nga huarahi, kati nga wai, katia nga tangata; kahore i tatatata te Hurai ki te tangata o Hamaria. Kahore i manakohia te tangata, i anga ona kanohi ki te haere ki Hiruharama. (Ruka 9, 53.)

Na, te putanga mai o te Karaiti, oti rawa atu te tikanga wehewehe, te tikanga kati. Pakaru iho te taiepa wehewehe. Haehaea te arai. Tahoroa nga maunga. Wharikitia nga repo. Whakaitia nga wahi kopikopiko. Whakamaenuetia nga wahi taratara. Whakamaroketia nga wai hohonui hei huarahi ma tana i whiriwhiri ai. Karangatia nga manu katoa o te rangi kia rere mai ki te rakau kotahi, maru ai. Huihuia nga hipi katoa, ki roto ki te kahui kotahi. Haoa nga ika katoa ki roto ki te kupenga kotahi. Tamariki a Hema, a Hama, a Tapeta—Tamariki a Aperahama. a Ihaka, a Hakopa,—haere katoa mai ki te Atua kotahi, ki te Ariki kotahi, ora ai i te whakapone kotahi:—mau ai ki te aroha kotahi—tu ai i te ture kotahi.

Tenei matou te tu nei, he teina, he tuakana, i runga i te whakaaro tahi. He Pihopa pakeha te teina, he Minita maori, te tuakana. Ko te hiahia tenei o toku ngakau o mua iho, kia waka-pakia te Minita maori, hei rite ki a matou. Ahakoa kiia e te pakeha, “ekore e rite.” kahore ahau i whakaae atu. Ahakoa kua mea te tangata maori i mua, “Hei aha mawai te Minita maori, ekore matou e tahuri,” kahore ahau i whakaae atu. Tohe tonu ki te whakato i nga tau e rua tekau, titiro mai,—na te Atua tenei hua. Ka titiro ahau ki aku tuakana, ki enei Minita maori, e noho nei, na, ka tino kaha rawa taku whakahua i to tatou waiata:—“Ano te pai, ano te ahuareka, o te nohoanga o nga teina o nga tuakana i runga i te whakaaro tahi.”

Tenei ano taku ritenga maori hei whakamutunga.

Kua kite ahau i tetahi manga i pipi mokemoke ki roto ki te repo. Heoi ano tona nuinga, he he nuinga paru kau. Ko tona otinga tenei, he ngaro noa. Ehara ia i te wai, ehara i te whenua. Kahore ia i inumia e te tangata, kahore i haerea e te hoiho, kahore i hoea e te waka: kahore i parautia e te parau; kahore i rerenga e te kaupuke. Kati noa iho i runga i tona nuinga poauau te manga kahore nei i pai kia rere ki roto ki te awa. Waiho, ma te tuna e ngokingoki, ma te poaka e titakataka ki reira.

Engari te manga ataahua, te manga pai, he mea whanau hou no roto no te kopu o te rangi; tirohia tona kaha ki te pekepeke ki nga wairere: ki te rererere ki nga taheke; he tohe hoki nona ki te mahi i tana mahi, ara, he wakanui i te awa. Tae rawa mai ki te putahitanga, kua ngaro tona ingoa. Tengaronga o Puniu, na, ko Waipa; te ngaronga o Waipa, na, ko Waikato: te ngaronga o Waikato, na, ko te moana nui. Ko tona nuinga tenei, ko to te manga, kia ngaro pai ki roto ki te awa. Ko tona nuinga tenei, ko to te awa, kia ngaro pai ki roto ki te moana. Waihoki, ko toku nuinga tenei, ko to te tangata kotahi, kia ngaro ki roto ki te Hahi; ko to te Hahi nuinga,